

有合南北而尤重南朝之議。蓋南北一日未合。足利氏之天下未定。故百方降正儀。不幸賴之被讒而罷。其議不成。則賴之心以南朝爲患已久。何百方謀之於生之日。而不敢一言於死之時也。賴之爲君計者。將曰。南朝天下之患也。強寇雖滅。未可自足。請君合南北。而尤不失信義於南朝。足以服天下之心矣。本以至誠思國之心。出以反復懇切之言。義滿亦必聽之。縱令不聽。賴之盡已之誠。可以死而無悔。今乃取阿諛之悅於將死。而貽驕盈之害於身後。豈謂病羸忽遽之言。不足制異日之君。言之無益。故如此而

已耶。管仲王猛亦豈不知其不足制君。然且言之者。所以盡已之誠也。賴之在已之誠未盡。而謂君之不足制焉。在其爲名臣也。嗚呼。賴之之生也。吾無敢議而於其死。不能無惜。故論之。使賴之而知之。必死而不瞑矣。

讀史贅議卷下畢







